

第一部分 江西地方志

江 西 通 志

光 绪 江 西 通 志

卷九十七·武功三

咸丰二年（壬子），广西金田贼洪秀全、杨秀清窜湖南桂阳、郴州，遂入湖北，陷武昌，九江戒严。十二月，巡抚张芾奉旨督兵驰赴九江会剿，驻军瑞昌。（档案）

三年（癸丑）正月，贼由武昌下窜江南，寿春总兵恩长战歿。总督陆建瀛急走还江宁，贼遂陷九江。巡抚张芾亦引兵归守。贼复弃九江，趋安庆，进陷江宁。至五月，贼再窜江西，南康募民缚官以迎贼。贼入南康，遂薄省城。（沈兆霖书粤匪过南康事云：粤匪自金陵窜江右，连樯入湖口。未至南康前一日，郡民数百人醵钱峙银米等，既备，乃入县廨诱令出，胁往城东偏〔边〕同善堂，启狱出囚。明日，郡守行香城隍庙，民又胁以往，环守之。日午，望贼舟近，并银米食物缚守令，迎而献焉，贼纳之。数逆酋使导之，入城周视，訖火一二祠寺竟去，民有随去者）。湖北按察使江忠源、护九江总兵罗玉斌方驻军九江，事急，九江不足守，芾奏移二军援省。时尚书陈孚恩方奉旨在籍团练防堵。忠源军至，芾与孚恩议委以军事。六月癸未，德胜门西地道发，毁城六丈余。忠源督军出战，贼不得上，堵筑一昼夜，城复完。壬寅，贼再穴章江门，复为

九江总兵马济美击走。癸卯，贼攻永和门，会济美为游言齟齬，愤激甚，锐志赴敌，猝中伏阵亡，从子炳元殉焉。波阳知县沈衍庆转斗而前，夺其尸归。七月，贼连陷丰城、高安、波阳、浮梁、乐平，势张甚。值援师四集，累战皆胜。八月，庚子戌亥之间，南风大作，各军整队齐出，焚贼垒殆尽。余贼夺船乘风下窜，复入九江。凡贼攻南昌九十余日，至是围解（档案、平定粤匪纪略。谨案：南康溃贼莠民经学政沈兆霖奏办，事定按名解省正法。浮梁之陷，莠民石芒源、石亮、余得溃、余德厚等，亦执知县谢方润，搜印敛钱以馈贼。方润不屈，死。事定，获芒源凌迟，亮、得溃、得厚斩梟）。

贼窜波阳时，知县沈衍庆方率勇援省，闻警急归，兼摄县事乐平知县李仁元，既受代，自请留郡办贼。城久圯，水盛涨，战守无具。七月，丁巳，舟贼数百甫薄岸，遂入东城。衍庆急督勇巷战，手刃二贼，仁元继进，贼已大至，众寡不敌，仁元殁于阵，衍庆负重伤力战死。丁卯，乐平陷。仁元之父文石、弟诚元、母妹妻妾及仆婢皆殉难。（档案）

时太和土贼窃发，扰吉安，围攻南门。知府王本梧督军守御，历五昼夜。贼不得入，焚古东山安福囤储漕米。七月，己巳，本梧出城击贼，毙贼百余。贼遁走，本梧督军穷追，中伏军溃，与照磨谢时霖同遇害。（档案、忠义录王本梧传）

四年（甲寅）七月，贼由都昌来，遂掠吴城、入渚溪、逼建昌山下渡。十一月，湖北田家镇败匪入吴城，焚民居。官军方围九江，贼欲争上游，以为牵制。庚午，贼至吴城，焚官军战船，陆军亦溃。十二月，前兵部侍郎曾国藩军为贼败于九江，退驻南昌。（档案。谨案：国藩督军东下叠克坚城，侦九江贼已穷蹙，期翦灭朝食。自吴城军溃，贼得以船炮环攻，遂致失利）

五年（乙卯），贼复陷饶州。二月乙巳，窜乐平韩家渡，众三千人。戴正才、伍连魁、程学叙率所部以寡击众，杀贼二百余人，学

叙歿于阵。贼转入德兴界。三月丙寅，复由黄柏塘小径陷弋阳。会宁绍台道罗泽南、安庆府知府李续宾率师至，与贼战弋阳西关外，歼数百人，贼遁兴安。既而婺源之贼来会，遂走大路口，乘虚入广信。丁亥，罗、李二军追贼广信，驻城西乌石山，营垒未定，贼出南西北三门，前后围攻。泽南督军筑垒如故，垒成贼气惰，遂发军纵击，贼大奔。次日，贼三路诱战，设伏林密。泽南以两军运奇御贼，分一军由他道击贼，伏贼失应援，众齐溃，遂薄城。是夜，贼启东门遁。（档案、上饶县志、忠义录罗泽南传）

四月，伪丞相锺贼攻义宁州。先是，伪帅金之利、卢拐子扰崇阳、通城，累犯州境，皆为团练所败，获金之利。四年秋，泰乡团练越境杀贼，克武宁。贼仇义宁甚，至是率数万，由楚北晓夜兼程扑州西界，与战不胜。辛亥，围州城。城四面皆山，贼分众踞险以绝外兵。八乡团勇群起救援，大小十余战，铜鼓都司张全孝、八叠司巡检吴元琛、团长魏漆清、曾承晖皆战歿。城中妇孺咸登陴助守，凡二十一昼夜，待援不至。贼于城西傍城筑墙，伏墙外穴地而攻。城中筑月城备之，工未竟。五月庚午城陷，州民犹巷战，自辰达午，殊死斗，知州叶济英阖门殉难，州同蒋启华亦歿于阵，丁壮妇孺同时毕命者十万余人。城陷三日，都司吴锡光始自饶州督军至，将合安乡团勇进取州城，及湘竹，贼麇至，军溃，锡光自刎死。七月，宁绍台道罗泽南督军由泰乡入，赣城镇总兵刘开泰由安乡入。泽南以州人李炎为向导，三战三捷，进据鳌岭；刘军亦至，乘胜合击，前后歼贼亦万余，遂复州城。时城内外积骸残烬，血肉狼藉，泽南檄州人掩埋为冢北门外凤凰山下，题曰“十万人墓”。（义宁州团练同仇录、州志、忠义录罗泽南传）

十月，伪翼王石达开自崇阳、通城败窜义宁州，众不满千，而紫陵逆党由万载来与之会。总兵刘开泰击贼于小斗岭，军败，开泰父子皆战死。十一月，贼由崇埠陷瑞州，分趋上高阴冈岭，陷临江。十二月，贼复出临江陷袁州。（义宁州团练同仇录）

六年（丙辰）正月癸未，吉安告陷。贼自五年秋由莲花厅入永新，进薄郡城。按察使周玉衡时为赣南道，闻警往剿，贼众我寡不能战，遂入城，与知府陈宗元、知县杨晓陶固守待援。十一月，临江贼复由阜田陷永丰、吉水，郡城益孤。正月丙寅，贼用地雷攻西月城，王虎臣、周恩庆力护缺口，参将柏英、都司马福寿缒城出战，贼始退走。壬申，我军复启小南门击贼，毁贼一营。时内外阻绝，文报至片纸密字十不一达，援师终不至。贼围日厚，更互迭攻，守丁莫敢少息。及城陷，官绅弁兵无一生者，周玉衡、陈宗元父子俱殉难。（档案）

吉安既陷，贼分党扰赣州。护巡道南安知府汪报润赴万安剿贼，不克，退守郡城。道路多梗，援师不得前，报润因乞师于两广总督叶名琛。名琛令潮州镇总兵寿山、南澳镇总兵谢昆、参将梁显扬率军援赣，破贼于光稻坪。自五月至十月，楼梯岭潭口贼垒次第歼灭，赣始解围。报润旋擢福建延邵建道，为人所谗，竟以侵帑被议。（赣州府志、忠义录汪报润传、粤东剿匪纪略）

临江贼攻樟树镇，败副将周凤山军，遂连陷丰城、进贤。至是，吉安之贼复陷永宁、乐安诸邑。二月丙午，分贼两路陷抚州，丁巳陷建昌，遂趋东乡、安仁、余干、乐平、万年，入浮梁。三月，侍郎曾国藩调李元度、林源恩二军赴抚州剿贼，复进贤、东乡，破贼五营，进逼城下。贼援踵至，建昌贼聚于油碛，瑞州、临江贼屯西津渡，崇仁、宜黄之贼经崇埠至秋下。官军四出截击，相持凡月余，大小二十余战，杀贼盈千，贼踞城如故。（档案）

时援师四集。湖南则道员刘长佑由醴陵进攻萍乡，遂抵袁州；同知萧启江、都司刘培元由浏阳至株树潭，以四月乙卯克万载，会攻袁州。湖北则游击普承尧、同知吴坤修、曾国华，由通城赴义宁州。水师，下游则惠潮嘉道彭玉麟驻吴城，上游则记名道刘于浚驻市汊，又分二营驻饶州、省河。李元度请发水师会攻抚州，乃以分营往。四月，刘于浚克复丰城。（档案）

都昌贼竟波北童子渡，都司毕金科所将兵仅千人，贼众五倍。五月辛未，金科以七百人中途邀击大破之。（档案）

八月，边钱会匪勾结粤贼，陷贵溪、弋阳，突犯广信。知府沈葆楨乞师于浙。贵州安义镇总兵饶廷选方驻师衢州，督所部赖高翔、毕定邦诸军驰赴广信，守御严密，贼不得逞。（档案、平定粤匪纪略）

援江楚军刘长佑攻袁州，自高冈岭进至沙田坵，萧启江军亦至土龙袁山下，断分宜、临江贼援。十月戊子，吉安贼万余入彬江，为我军击走，踞合山。戊戌，都司田兴恕统军至。庚子，会攻彬江，焚贼垒。时贼踞城中者为二党，一皆广匪，一属伪侍卫李能通。癸卯，能通令难民持书出城乞降，刘长佑令知县刘坤一单骑觐之，谕以祸福，能通感奋，愿为内应，许之。十一月甲寅，能通令内应启西门，刘坤一与都司黄三清、守备梁开国夺门而入，登城大呼杀贼，广匪犹死拒，擒伪检点黄毓生，余众越东门遁走。庚午，官军复分宜。（档案、袁州府志、平定粤匪纪略）

十二月，西安将军福兴奉旨督办江西军务，驻广信。（档案）

七年（丁巳），闰五月丁亥，湘军记名道王鑫攻吉安水东（谨案：是年二月，刘长佑军屯太平墟，为贼所败。湖南巡抚骆秉章檄王鑫、江忠义两军来援，既至临江，鑫以贼众萃于水东，遂率师渡河击贼）。贼窜水南，与万安逸贼合犯永丰藤田。鑫抵藤田，伪裨天侯胡寿阶率众数万至沙溪出藤田后，鑫败贼于陂头。次日，贼大举犯藤田。鑫见贼至，令军攻其左，贼众悉左，急自将敢死士百人攻其右，贼阵乱退走；再蹙之于瑶岭，擒胡寿阶，余贼丧胆；进击沙溪，又败之。贼之留永丰者尚八万人，鑫以千二百人往破之于钓峰。自鑫渡赣江九十日，凡十二大捷，俘馘万余。（档案、忠义录王鑫传）

初，曾国华丁忧归，以刘腾鸿统其军，合普承尧、吴坤修之军攻瑞州，筑长濠以困贼。围既合，贼不得逞，夜辄越濠焚民居，皆

为我军击走。于时麦熟，腾鸿恐资贼粮，乃过濠诱战，尽割以归。贼援绝粮尽，犹出城拾野菜掘草根为食。七月壬辰夜，各军合击贼，贼不支，遂复瑞州。是役也，腾鸿期即日破贼，身先士卒，为飞炮所中死；其弟腾鹤大呼复仇，勇气百倍，卒克坚城。时论嘉之。（档案、平定粤匪纪略）

刘、萧两军既克袁州，进剿临江，屯军太平墟及阴岗岭。二月，贼首韦志俊渡三曲滩，刘军接战不利，退驻分宜。同知刘坤一整队复进，败贼于淦水之西，复屯太平墟。贼欲北走瑞州，萧军败之于阴岗岭。三月，刘于潯水师继至，攻毁附城炮台。四月，王鑫亦移营近郊。于是，刘、王两军屯西南，萧军屯东北，水师浚沙湖支河分道逼城下。五月，筑长濠，军已合围，贼犹死拒。贼党在新淦者，由新淦、峡江冀潜渡入援。王鑫既破水东之贼，引军往乐安，进规抚、建，旋以病卒。水东阜田之贼复炽，周凤山诸军皆败，遂出安福窥新喻，冀援临江，众数十万。普承尧一军甫至罗坊，营垒未立，贼已大至，败走阴岗岭。刘坤一由太平墟至黄岗，约团练为守御计，闻贼至东岸，急调兵千人驻铁树岭。庚午，战于罗坊渡口，获小胜。辛未，承尧军失利。贼入罗坊，长驱而下。坤一军亦败至阴岗岭，黄岗、太坪团约尽解。城贼知外援将至，日出苦战。官军腹背受敌，议者欲还师，图再举。长佑愤然曰：“攻此城半载余矣，功在垂成，岂宜一旦委弃，只有并力决战耳！”遂留三成队守濠，七成队赴敌。是日，大风扬尘，天空黯淡。鼓众一呼，元恶先后，破贼六营。贼马队复出，又为我军奋击，马皆反奔。各军继进，尽平贼垒，遂过太坪，穷追至黄岗，贼遁归阜田。九月，长佑以贼犹望外援，设疑兵作援贼状。贼果出城分路迎战，复为我军所败。至是，贼伪检点程瀛屡乞降，未之信也。十月，程瀛复乞降，许之。丁卯，刘长佑巡军南门，程瀛至，缴伪印三百余颗，约诘朝以众来归，甫入城，为贼所杀。伪军帅宁正魁率其党二百余人越城出，告内乱。麾军急攻，贼乃伏匿。刘坤一令各军少退以诱贼。贼

果出小南门，方踰濠，我军转斗，破其土城而还。厥后我军数挑战，贼负隅自固，有时倾巢来，我军环击之，歼焉。贼既不敢出，抚州援贼又阻水军不能至。十二月乙卯，贼弃城南遁。（档案）

贼入九江于咸丰三年。六年冬，浙江布政使李续宾既克武昌，遂溯〔顺〕江而东，合彭玉麟、杨岳斌水师攻九江，浚五濠，筑长围，以困贼。提督鲍超方驻二套口，攻小池。七年八月，小池贼遁走。九月，彭玉麟败贼于湖口，进攻石钟山，分击梅家洲。李军潜济八里湖，绕出山背，贼惊溃，断其浮桥。于是，水陆诸军皆合。十月，雷家渡口、八里湖、白水湖，皆立营垒城。围既密，谋掘地道，复为石阻。八年二月，续宾环城审视，得东门外磨盘洲中岗地驻军。其巖穴地为三道，令水陆各军往复攻战，以误贼工，凡月余，先成其二。三月辛丑，越五日乙巳地道发，皆毁城数丈。贼犹死拒，我军不能进。四月壬子地道再发，东南城尽圯。副将李续焘先登，拔新坝铁栅，攻其西。水师自北门入，杀贼无算。余众突围出，尽溺水死。（档案、九江府志、平定粤匪纪略）

官军既克临江，乘胜攻抚州，楚军围其东，而西而南，江军水师扼其北。贼启东门，率二千余人分道迎战，为楚军所败，遂逼城。刘坤一、萧启江两军亦分道进师，刘军次秋溪、萧军次上顿渡。贼猝至上顿渡，启江坚阵以待，坤一遣邓在富将二千人往援，遂合击，大破之，再战再捷，进次高桥。建昌援贼出龙古渡，欲袭我军之后，在富出不备击之，破贼七垒，贼援绝。先是，刘于得令水军伪通贼为内应，贼信之，战船得泊城下。四月乙丑，贼内乱，城中有杀声。水军自北门入，楚军自南城入，贼错愕不敢战，走东门，尚万人。官军追剿斩馘及溺水死者二千有奇，生擒百六十四人。贼自抚州奔建昌。（抚州府志、忠义录萧启江、邓在富传）

建昌之贼，负隅最久。泊张运兰攻建昌，先败贼于磁圭、赤家山。贼复自云密、双游倾巢出屯新丰，运兰引军夜袭，毁贼三十营，追至陈家山。贼久胆落，四月庚午夜中，视城外鬼磷遍野，复

大惧，弃城走。官军收复建昌。(档案、新城县志)

贼之救临江也，遇我军截击不得越，尚踞吉水。总兵普承尧方合张运兰、王开化之军驻沙溪。十月癸丑，普军取道真君山，张军取道螺子山以攻贼。贼亦分众迎战，为我军所败，遂克将军岭、周家岭、陂头。明日，遮克敦布、曾国荃、赵焕联、刘培元诸军，进击曲瀨、瓦窑，连破贼垒，进攻县城，克之。再战再胜，贼遁八都墟，张军追至西坑而还。十一月，吉安贼分门出犯，我军已合围，数战皆捷。八年二月，贼再犯真君山，复为我军所败。及重午日，遮克敦布率师伪为竞渡，突上白鹭洲，破贼土城。贼以水军屡攻浮桥，又屡败于我。八月丁巳，水师先登纵火，启门迎官军，遂克郡城。(档案)

抚、建既复，贼悉众犯浙，由浙窜闽，退攻广丰、玉山，不克。八月，出黄土关，犯新城。刘长佑率军迎击，斩首数千，进剿熊村、圆村、汤坊，傅坊，七战七捷，贼走甘家隘。丁未，我军乘大雾趋甘家隘，路险绝，贼不得遁，追杀二十余里，先后擒斩二万余人。(档案)

九月，贼围南安，踞新城墟，趋贤女埠。十二月壬寅，郡城陷。知府叶球、大庾知县黄荣庚死之。时萧启江方驻师赣州，南康知县周汝筠闻变乞援。九年二月己未，萧启江攻贼贤女埠，破新城墟，追抵池江。辛酉，我军复小挫，退麻布垄。乙丑，再攻池江，克之，尽焚小溪、凤凰城、长江墟贼巢，贼众宵遁，复郡城。(档案、平定粤匪纪略)

自四年贼入饶州，遂出没浮梁之景德镇，无宁岁。毕金科以七年正月元日，孤军攻镇贼，遇伏战歿，贼无顾忌。八年十月，鲇鱼山官军又失利，虐焰益张。侍郎曾国藩方督师建昌，三面皆贼，东闽连城，南则信丰，北为景德镇。会连城、信丰之贼，势蹙欲遁，独镇贼负隅如故。国藩以为贼之踞此，无论东窥广信，西趋湖口，皆莫大之患，且三河军溃，大江北岸，防不胜防，若彭泽、湖口复为

贼有，九江亦危，因调张运兰军合刘于浔水师会攻景德镇。十二月，张运兰进营寺前，王文瑞引军至黄泥头，遇贼战胜，已克上下里村，而水师又败于贼。及九年正月，浮梁北乡团勇屡破贼。己亥，官军攻贼垒，中伏退屯黄泥头，赖后军继至，贼始却。会大雨连朝，江水盛涨。于是，水师攻克十八渡，毁小港嘴炮台，发战船渡陆军以合击。自二月至五月，我军九次攻镇皆捷，然贼垒坚不可拔。知府曾国荃统军自抚州取道东乡、乐平、入三溪，营于知觉岭，贼悉众拒战皆败衄。乐平、浮梁团丁合万余人，咸贾勇誓死随官军入镇杀贼，贼受大创。六月壬子夜，遂弃镇走入祁门。（档案、饶州府志）

赣郡自六年解围以后，定南、长宁、安远、会昌、兴国、于都频年征战，独定南厅为萧源伟攻陷，旋已克复。代理同知姚世恩以追贼阵亡，然邱文光、马修良卒斩贼首谢三满以归。民团则举人徐嶧战于下历，毙贼数千。长宁诸邑田兵咸合力拒贼，贼不敢犯。于都知县潘毓瑞尝会攻宁都，复败信丰逸贼。十年六月，同知周庆榕且督南康练勇越境杀贼，复广东仁化县城。当是时，外郡半为贼扰，而赣独完。虽民自为守，足以御侮，然危地能存，实巡道汪报润力也，故赣人至今思之。（档案、赣州府志、粤东剿匪纪略）

十年（庚申）七月，吏部尚书陈孚恩、右侍郎万青藜等，奏江西办理团练，酌保督办帮办各员。有旨：四品衔前翰林院修撰刘绎赏加三品京堂衔，作为江西团练大臣；吉南赣宁道沈葆楨布政使衔、甘肃安肃道刘于浔帮办。九月，陈孚恩奏沈葆楨告养开缺，请于布政使张集馨、督粮道李桓、吉南赣宁道李瀚章简派一员。奉旨以吉南赣宁道李瀚章帮办。（档案、通案；同时奏保者前湖南辰源道鍾奇鸿，湖北督粮道石启琛，吏部郎中梅启照，刑部员外郎曾作舟，户部主事吴增造，刑部主事刘宗岱，户部主事何桂芳，候选郎中程修礼，中书吴芳兰、陶作宾，知府丁峻，直隶州知州屈蟠，知县黄赞禹、王采藻、李文垣，训导兰炳芳、姚步瀛，游击韩进春，均奉旨

归团练大臣差委)

十一月，贼首黄文金由建德入犯江西，窥景德镇。太常寺卿左宗棠军松岭，提督鲍超军施家岭，贼不能进，走洋塘。鲍军由洋塘追贼至彭泽下泥坂，宗棠分军驻小麦铺。十一年正月乙卯，鲍超令总兵陈大富趋建德，断贼援，已率全军进黄麦铺，遇贼战，大胜，追四十里至建德县。陈大富已会合水师先复县城，贼众宵遁。(档案)

是月，伪忠王李秀成由广信围建昌。二月丁卯，贼趋崇仁，攻抚州，为水师所败，窜临江。三月，复由新喻罗坊渡阴岗岭，陷瑞州。七月己丑，贼闻提督鲍超军至九江，急遁走。乙未，复瑞州。于是，奉新、靖安、安义之贼悉遁临江，渡河扰樟树、沙湖至丰城，绵亘百余里。乙巳，鲍超由瑞州督军至丰城西北岸。庚戌，贼整队山岗，我军张左右夹击，分兵出山后扼其背，贼大奔，斩首盈万。(档案)

同治二年(癸亥)二月甲午，伪孝王胡鼎文由龙船湾犯梅源桥，程发达率团勇伏桥左，俟贼过，突出毁桥，斩首百余。丁酉，参将韩进春督军合团勇击贼于遇田，殪其前锋，贼遁走，擒伪丞相王贵会，次日复战，韩进春手刃骑贼五人，贼大溃，由洋塘山径入许家山。丙午，伪堵王黄文金率悍贼十余万，由祁门桃墅岭合许家山贼至。丁未，贼分众列上下游，飞流竞渡。韩进春以众寡悬殊，誓死战，甫令前军诱贼过河，东西两军已为贼隔。进春十营尽起，亲率敢死士冲贼右翼，西路始通，东路马队亦突围出。自己至申，各军奋战，贼败走枫树院，胡鼎文死，戮其尸。(档案、饶州府志)

黄文金既败，西窜湖口，时贼众为三，一由文桥，一由梧桐岭，一由太平关。浙江盐运使李榕督军战彭泽项家山，既克捷，闻湖口告警，五月己未进营三里街。提督江忠义自九江东渡来会，屯坚山。六月壬辰，贼自文桥犯坚山，江军直前迎敌，李军继至，贼却走。甲午，贼悉众伏张天社酬山，遣其党趋坚山诱战。自辰至午，我军坚壁不出。贼计沮，分三四千人攻江军左翼，余众尽出，

三面合围，我军迎击，毙贼千余，前者死后著继，贼终不退。有悍酋屹立贼阵吹号麾众，降卒邱福胜识为黄文金营官黄仁遗，令火器队同时并发，应声而仆。贼大溃，退入文桥。会浙江援军按察使刘典，及席宝田、顾云彩、屈蟠诸军皆至，败贼于青山桥。屈军再败之段家洲。七月丁未夜，江忠义约李榕会攻文桥，出贼不意焚七垒，追至建德罗家畈，贼尸山积。时援贼数万已出官军之后，赖部司夏基鸿鼓众血战，短兵相接，以一当百。贼失援，遂不支。（档案、平定粤匪纪略）

自二年十月，官军克苏州，三年二月，克杭州。我军攻江宁者亦克天保伪城，营太平、神策二门。援贼不得入，守贼不得出，贼众无归，复窜江西。伪沛王谭贼败于抚州，率党潜趋建昌。刘于浔遣军往援，一战于金竺山，再战于万年桥，斩伪将朱义。值韩进春、席宝田各引军至。二月己丑，密约诸军分路捣虚。贼迎战，中伏大溃，退至兜港，窜新城、广昌界，陷南丰。（档案）

四月，贼陷弋阳。己卯，道员陈鸣志、邓子垣督军赴弋阳，遇贼于连湖坂，雨甚。我师伪退诱贼，贼亦退，提督徐生德卷旗疾入，贼掠而走，乘胜克弋阳。别贼聚沙溪者，由灵溪桥犯广信，不克；复南窥广丰，道员王德榜、张岳龄败之青荆山石灰岭，再击之洋口镇；贼入铅山境，踞湖坊，弋阳败贼趋马鞍山，复为我军击走。乙酉，伪侍王李世贤率贼众越金溪走浒湾，为刘于浔水师所阻，不得渡，丙戌，攻抚州东门文昌桥，于浔率水师力击贼。胡迪堂者，以勇倣为贼所倣，至是血战三昼夜，猝中炮殁于阵。于浔急挥军死斗，营官黄名扬燃巨炮击贼，贼奔民房，蔽墙拒守。我军复登岸毁墙，始退走。已而贼大集，更互鏖战见星未已。及夜半，贼前队皆湿絮加木以护首，呼噪出，我军屏息待之，既近，炮发殄其众。后贼继至，黄名扬击以火球，毙贼无算，达曙始却走。戊子，贼再攻桥，蜂拥而上，复为黄名扬所败。余贼方集千金坡，将偷渡，水军夺其辎饷，乃走浒湾。己丑，李春培追击于浒湾，遂遁入金溪，沿河上

甯，袭建昌万年桥，席宝田、刘胜祥力战却之。甲午，贼西渡，陷宜黄、崇仁。（档案）

五月，伪听王陈炳文、伪康王汪海洋，自上清宫入金溪黄道山，窥浒湾；分甯泸溪，入新城，趋东乡。官军战于斜头，丁姓中伏失利。（档案）

六月，王德榜率军由弋阳赴樟槎袁家坝，总兵孙昌国方攻盛源洞贼，斩首数百，贼退鹰潭。王德榜军至安仁合攻鹰潭，追贼至邓家埠。时陕甘总督杨岳斌奉旨督办江西、皖南军务。岳斌以贼势趋重崇仁，取道丰城，驰往督剿。先是，江、席两军围崇仁，累战皆捷。六月丙戌，鲍军由丰城进桥东，贼从南丰间道犯秀才埠，为我军所败。时汪海洋方据浒湾，遥为声援，岳斌乃檄鲍超，先攻浒湾。七月己亥朔，鲍军至七里岗。壬寅，合军击贼，刘于浚率水师助之，焚凤凰岭、琉璃岗、许坊、苦竹、中洲、洋洲贼垒，毙贼万余，既克浒湾，贼势大蹙。甲辰，刘典军攻崇仁民城，江忠朝、席宝田军攻官城，贼分众拒战，覆之，乘胜进据西门小埠。戊申，刘典令刘胜祥逼城而营，与江、席两军环城击贼。贼愈恐，夜遁宜黄，刘典急督军攻宜黄。先是，宜黄贼已分半入南丰。崇仁败贼皆入南丰，我军至宜黄，贼悉遁南丰，遂复宜黄。官军复崇仁之日，贼之踞东乡者，亦为提督周宽世所败，遁入金溪。鲍超既克浒湾，拔营攻金溪，适以是日至，遂歼贼于枫山铺，追至北门。营官周有胜奋夺鹧鸪岭，破贼七营，谭胜达击和尚桥瓦窑贼垒，洪容海攻北门，王衍庆攻东门，斩关入，贼南窜泸溪，入白杆村，潜伏山谷。是月庚戌，陈炳文三次诣鲍超军前乞降，许之，散遣其众六万余人。（档案）

席军之围南丰以四月。守备杨明发夺门入，中炮死。矢石雨下，我军不得前。六月，与刘典军败贼于铁子岭。至是，韩进春败贼于上塘，进规南丰。七月甲寅，战于里塔墟，甫交绥，贼急走入城。乙卯，我军进逼城下。丙辰，分道攻城，贼列阵北门以拒敌。会

鲍军马队继至，遂大溃，绕城走，一趋广昌，一趋河东。河东之贼为鲍军诛斩殆尽。（档案）

南丰既复，贼之在泸溪者，提督唐仁廉先败之于西乡至珀环，追至三江港口。至是，拔营攻新城，尽歼竺油、亭坊、潭市街、洪木街之贼。会鲍超驰抵建昌，将马步全军扼上塘。战于大洋渡，贼败走中田。七月戊午夜四更，谍告贼遁，鲍超督各军齐进，遂克新城。（档案）

宜黄败贼方围宁都州，南丰贼合之，麋聚城下。知州郭毓龙婴城固守，斩奸民彭世春。贼失内应，气大沮，走于都。吉南赖宁道王文凤败之于今溪，贼匿城中。八月庚午，贼忽弃城过河犯安远，为团勇迎击，走信丰，踞乌溪滩；旋窥枫树坳，复为江忠朝所挫，绕广东南雄州边境，犯南安，踞水城。江军往援，苦战五日。乙酉，贼走梅岭，我军追至梅岭中站，贼遁南雄州，窜龙南泗源堡。知县蒋如珪、把总范应龙等再败之，贼走定南境。（档案）

九月庚子，汪海洋败窜瑞金，焚劫民寨，攻九堡、鸡星，不克，欲趋宁都。鲍超军至宁都，贼由桃阳隘入闽，复入粤，踞嘉应州。（档案、瑞金县志）

大军克复江宁，贼首洪秀全已死，鏖其尸。其子福瑱薤发潜遁，率余党由陈坊花桥分两道，一出光泽，一出泸溪。残匪数千，避兵而走，不循蹊径，气力衰竭。席宝田追贼至石城，穷搜荒谷。九月癸亥，游击周家良获洪福瑱及伪王洪仁玕、黄文英、洪仁政等。事闻有旨，洪福瑱么魔小丑，漏网余生，不值槛送京师，即在江西省城凌迟处死。（档案、平定粤匪纪略、石城县志）

四年（乙丑）四月，西征叛勇由湖北通城窜义宁州，为军团击却。既而陷万载，攻袁州，官军赴援，复窜萍乡。五月丙申，为官军所败，窜湖南攸县。继由广东南雄州窜信丰界，总兵吴云集逐之，遁和平。六月乙未，复由兴宁窜长宁留车墟，提督周宽世引军击逆，退入平远。旋走大柘，诣总兵方耀军乞降。（档案、义宁州志、袁

州府志)

时粤贼殄灭，胁从解散，独汪海洋偷息〔袭〕闽粤江西边境，屡犯长宁、信丰、定南，又入下历，攻龙南城东门，皆为官军击走。至是，王开琳军出定南，席宝田、周宽世两军驻铁石口，娄云庆军循信丰出南安，视贼所何，相机应敌。初，巡抚刘坤一奏：

“各防各疆，恐防久生懈，宜合闽楚各军越境围攻。”有旨嘉许。九月庚午，巡抚督军赴赣州会剿。十二月，三省大军收复嘉应州，汪海洋伏诛。其党谭体元率众窜黄沙嶂，为鲍超诸军擒斩，尽降其众。爰留席宝田一军赴兴宁除余孽。边境解严。（档案）

南昌府州县志

同治南昌府志

卷十八·武备·兵事

咸丰三年正月，粤西金田长发贼洪秀全、杨秀清等，由湖北下鄱，江宁城陷。五月，贼由江宁统舟师入九江，进围南昌城。巡抚张芾预调湖北按察使江忠源入城御之，总兵马济美战死。攻益亟，守益固。八月，贼穷弃营走。（南新县志）。

先是，江西巡抚张芾会师九江防堵，兵溃，省城汹汹，旋闻贼径窜江宁，风鹤稍定。五月初五午后接警报，知贼于四月二十六日自江宁开船径入江西。张芾知湖北按察使江忠源智勇沈毅，适奉檄援皖，路过九江，即飞调赴援。十七日，江忠源统楚勇至，张芾与在籍尚书陈孚恩计议，悉以军事委之。甫入城，令毁城外民居为固守计。十九日，贼船约八百余艘，分泊七里街、周公亭及盐仓、司马庙各处。二十日，兵勇缒城下，于德胜门接仗，伤贼数十名，杀黄旗贼一名。贼船悉数围城，独缺进贤一门，又于北兰寺坚壁立栅，沙井及扬子洲搭棚通市。二十三日，贼于德胜门外挖地道，江忠源仿明戚继光瓮听法，使人伺声息，果获穿地贼数名斩之。是夜，德胜门地雷发，轰塌城垣数丈，登时堵筑，火箭齐施，贼不敢逼。二十七日，九江罗玉斌统〔瑶〕兵至。六月初二，保信军、楚勇、章武军、宜春勇、绅勇、九江镇标，分队击贼于顺化门，贼尽扑地，候炮过突阵，我军几不支。城上急发大炮，贼船被燬，有堕水死者，兵威稍振。初四日清晨，倪家塘北城裂六垛口，贼蜂拥扒城，

官军开炮击退。少顷，又援云梯上，楚勇赶下杀贼百余名，官军大胜。初五，云南开化勇到省。初六日，新授九江总兵马济美到省。永和门内府照墙背获大铜炮一尊，安置城上演放，声洪力猛，沙井贼为之罢剧，城中称为神炮。时久晴，波阳令沈衍庆遣人赍密书入城，献火攻策，愿自备小船三百，伏圆觉寺，约夜深举火为号，随风纵火。城中以为危计，不听，转饬沈衍庆迅回饶郡防堵。十三日，瑶兵挑战杀贼二百余人，枋子厂炮台被神炮焚毁。十五日黎明，马济美统四川兵出永和门，江忠源统楚军出章江门，罗玉斌统瑶兵出德胜门，三队会击，连破贼垒。贼自是不敢轻出。二十二日，江水暴涨，贼分股上瑞河，旁掠丰城，高安令死之，转生米巡检沈琅被戕。二十三日，贼用地雷轰陷章江城垣三丈余。贼蚁附乘城，张芾、陈孚恩急督城上兵勇，刀矛奋击。贼犹敢前，江忠源急令倾火药数十桶，烧杀无算。且战且筑，尸与上石杂揉，一夕城完如故。马济美愤久围不解，请尽出城内精兵会攻，众难之。济美慨然曰：“既我将家子知有战耳。”会有以他事语侵美，美不悻，谓左右曰：“吾以一死报国。”二十五日，会罗玉斌击贼，济美带章武军接战，杀红巾贼，尸横满地。官兵大胜，方收军回，贼犹谩骂，美复冲入贼营，追杀数十人，伏起中枪死，其侄马炳南亦中枪死，罗玉斌夺尸还营。时洪水陡涨丈余，贼埋巨炮城下，俱湿透不复燃。二十八日，贼放重装船顺流下。七月初一巳刻，张芾登德胜门城楼督战，忽大炮子迎面飞来，前毙材官哈玉恩，后毙家丁郑贵，血溅芾衣，神色不变。自是，城中防堵益固。十九、二十两日，贼三面环攻，炮子雨下，城中出死力守御。会吉安府泰和、安福等县妖贼滋事，楚南团防大臣曾国藩遣候补道夏廷樾、郴州知州朱孙诒与江忠淑、刘长佑、罗泽南带兵入援，先后至城下。贼见援兵至，大惧。又各路解到军饷、火药，俱从南昌中洲护送进城，接济不绝，贼始萌去志。八月二十二日酉刻，头队船多张旗帜，向新洲逆上，黄昏时忽回船向干空巢颺去。二十三日，官兵追贼已无及矣。江省被

閏凡九十五日，賊百計攻城，城中亦多方堵御，故城危而卒保無虞。人多以江廉訪堵御之功，而巡撫張公之虛心善任，為不可沒云。（《戰壘紀聞及守城日記》）

咸豐四年正月，通山土匪盧拐子擁眾入寧州之泰鄉，知州叶濟英击败之。（《義寧志》）

二月，興國龍港土匪聚眾寇武寧，典史湯道增帶勇堵御不勝，被殺。盧拐子由九宮山入木高，前任湖北巡檢成鶴立在籍謀御之，被賊戕死，尋竄寧州敗遁。（《武寧志》）

三月，偽閩宗勛陳文金等，擁大股寇寧州之泰鄉，千總張朝標守三都小港嘴失利，團勇三百余人死之。翌日，扑州城，踞鳳凰山嶺。叶濟英飭城中居民登陴固守，督廣勇協同八鄉團勇兜擊，殺賊一千有奇，溺死無算。（《州志》）

四月，陳文金率土匪張青元、黃祖紳等，由丰良趨武寧縣城，知府劉煥昌、都閩宋光玉、海通死之。賊仍竄寧州，團勇击败，仍回龍港。五月，賊復扰余家橋，余派烈力战死，又分股踞申口。余璣馨率子廩生余源督千余人，由塘埠繞擊，賊橫陣挑之，大敗，余源等二百七十四人皆死。六月，官軍克復武寧縣城。（《武寧志》）

秋七月，陳文金等復攻武寧，前任湖南知縣劉朝馨、把總哈玉龍、馬春芳皆死之，城復陷。土匪黃祖紳、周逢春遂率其黨寇四鄉，掠靖安敗回。安樂鄉王庆恩于七月二十一日渡河击賊，妇孺皆擲石助斗。賊遣別將繞后环攻，团勇阵亡甚众。（《武寧志》）

八月，罗贼统千余人由瑞昌入武宁大桥河，举人熊传渭率团勇击之，贼退。（《武寧志》）

九月，武宁城复。（贼踞南市造浮桥。都閩吳錫光帶新勝軍四百人，自寧州入境，督西南兩鄉團千余人，由南岸東下击賊長岭上，败之，直趋南市渡，毙贼二十余人。后升副将、先当军功之熊应文，督带泰乡团勇，随同奋力攻剿。贼不支，弃城遁。先是，八月，伪丞相魏载，万贼率大股数万犯宁州东界，泰乡团勇同官军进